

Kongres Profesor Negara Rumus 14 Resolusi

Unit Komunikasi Korporat

Telah Dihantar: 10 Julai 2011 9:55

Kepada: UUM - All Staff; UUM All Students

10 JULAI 2011/8 SYAABAN 1432H

=====

"UUM : UNIVERSITI PENGURUSAN TERKEMUKA"
(THE EMINENT MANAGEMENT UNIVERSITY)

Oleh: Muhammad Mustakim Ramli

Gambar oleh: Shamsaimi Ezil dan Muhammad Shamsul Shafie

KONGRES PROFESOR NEGARA RUMUS 14 RESOLUSI

UUM ONLINE: Pengarah Kongres Profesor Negara, Prof Datuk Dr Mohamed Mustafa Ishak telah mengumumkan 14 resolusi yang telah dirumuskan oleh Majlis Profesor Negara (MPN) mengikut kluster dalam merealisasikan Agenda Transformasi Negara.

Pengumuman resolusi itu dibuat oleh beliau yang juga Naib Canselor, Universiti Utara Malaysia (UUM), sebelum diserahkan kepada Timbalan Perdana Menteri, Tan Sri Muhyiddin Yassin dalam majlis perasmian penutup kongres tiga hari itu, di Pusat Dagangan Dunia Putra (PWTC), semalam.

Empat belas resolusi berkenaan membabitkan kluster sumber asli dan alam sekitar, ekonomi dan kewangan, governan, perundangan dan pengurusan awam; teknologi maklumat dan komunikasi, industri dan inovasi serta kejuruteraan dan teknologi.

Selain itu, kluster sains dan matematik, pembangunan sosial dan kesejahteraan, pendidikan dan pembangunan modal insan, perubatan dan kesihatan, politik, keselamatan dan hal ehwal antarabangsa, farmasi dan sains gunaan, sejarah, warisan dan sosiobudaya serta pertanian dan makanan.

Dr Mohammed Mustafa berkata, di bawah kluster sumber asli dan alam sekitar, adalah amat perlu negara mengukuhkan dasar proses perancangan dan governan yang syumul dalam sektor sumber asli dan alam sekitar, dengan menyatupadukan dasar-dasar yang berkaitan dengan sumber asli dan alam sekitar.

"Bagi merealisasikan transformasi ekonomi, komitmen yang tinggi dan berterusan serta perancangan yang mantap mencakupi kesemua sektor ekonomi, lapisan masyarakat dan wilayah amatlah kritikal.

"Transformasi ini mesti disokong oleh sistem pelaksanaan, pemantauan dan pelaporan berdasarkan sasaran keberhasilan yang konkrit dan jelas, didokong oleh ketelusan dan kebertanggungjawaban," tambah beliau mengenai resolusi kluster ekonomi dan kewangan.